

Steilas – buca mo astronomicas

Chor viril Laax e Chor mischedau Laax cun concert communabel



Umberto Camathias (sen.) ha surpriu il chor viril avon 12 onns, Rest Giusep Tuor il mischedau avon 25 onns.

(foto: Augustin Beeli)

(anr/abc) Ils dus chors da Laax ein vidlunder da preparar in concert communabel. Igl ei igl emprè ella historia. Quei concert ha ina muntada speciala ed in program special. Il motto dil program secloma «steilas». Canzuns dallas steilas dat ei massada. Ils carstgauns tematischeschan bugen quellas che tarlischan al firmament nocturn. Las steilas han gia adina leventau ils sentiments. Il program dil concert communabel ch'ins sa guder sonda e dumengia proxima a Laax tucca sil viv. Sco quei ch'il dirigent dil Chor viril da Laax, *Umberto Camathias*, descriva, ein denton buca las steilas realas el center. «Igl ei ils patratgs ch'ins ha durent contemplar las steilas. Ellas pon regurdar nus a temps passai, ad enzatgei bi, alla vargheivladad, al nunenconuschent ni al futur.» Era carstgauns san ins considerar sco «steilas» empalontas. Aschia dat ei massa «stars» cunzun el sport ed ella musica. Ils heroxs, ils gladiaturs moderns, ch'ins admira e ch'ei exempels cun lur prestaziuns. Il concert communabel dils chors da Laax sededichescha denton buc allas steilas humanas, mobein a diversas tematicas ch'occupan ils humans gi per gi.

Duas steilas fixas

Igl auditori ella halla da gimnastica dalla scola Grava a Laax astga selegrar d'ina sera fetg creativa. Il program da concert ei partius en quater blocs. Quei ch'ei da gir ei ch'igl ei in concert cun duas «steilas»ord las retschas dils dus chors. Inagada eis ei il concert da cumiau pil dirigent partent dil Chor viril da Laax. Culla fin digl onn da cant 2016/2017 dat Umberto Camathias giu la bitgetta suenter 12 onns. Igl onn 2005 aveva el surpriu la responsablada musicala per quei chor. Lezza gada fuva el gia en funcziun sco giuven vicedirigent da 24 onns. Sut sia direcziun ei il Chor viril da Laax daus en egl – ni plitost ell'ureglia ed el cor – cun prestaziuns excellentas. Buca mo a fiastas da cant, era ad occurrenzas dil vitg ed era cul cant ecclesiastic. En regurdientscha han biars probabel las producziuns per la sesiun d'atun dil parlament federal il settember 2006 a Flem. Al concert da cumiau vul Camathias denton buca che sia persuna stetti el center, mobein – las steilas. Cun quella tematica s'accorda era il giubileum da *Rest Giusep Tuor*. Avon 25 onns, igl onn 1992, ha el surpriu la direcziun dil Chor mischedau da Laax. El ei aschidagir ina steila fixa da quei chor. Era el tschenta denton buca sia persuna el center. Sia fideivladad e sia cumpetenza musicala han tonaton contribuì essenzialmein da mantener allerts a Laax il cant mischedau. Contas fiastas profanas ed ecclesiasticas ch'el ha dirigiù en quels onns ha Tuor probabel buca dumbräu. Adina puspei ha il chor realisau projects surprendents da tut gener.

«La sera spel lag» da...?

Las duas «steilas» fixas che diregian ils dus chors da Laax han preparau in program da concert che vegn a muentar e commuentar. Igl ei buca igl emprem project communabel dils dus chors, denton igl emprem concert communabel. Ils quater blocs dallas steilas ein titulai cun «La sera», «Nos cumponists» cun integrau la «Cardientscha», lu il bloc treis cul tema «Brama» ed il quart cun «Steilas fixas». En quels dus blocs presentan ils chors lur canzuns da pag per la Fiasta da cant districtuala dils 10 da zercladur a Falera. «Igl ei nossa steila fixa per il proxim temps», gin ils dirigents. Treis premaudiziuns aud'ins. *Gion Balzer Casanova* ha mess en musica pil chor mischedau il text «Laud» da *Mariano Tschuor*. Il chor viril conta «Sur nebla grischa», ina cumposiziun nova che *Armin Caduff* ha fatg aposta pil Chor viril da Laax tenor in text da Victor Durschei. Lu astg'ins tedlar «La sera spel lag» da... Na, buca da Gion Balzer Casanova. Gion Antoni Derungs haveva fatg quella canzun cul text da sur Flurin Camathias els onns sissonta, igl ei in toc che deriva ord il relasch dil renomau cumponist. En scadin cass era quei ina premaudiziun.

In fatg interessant ei ch'ils dus chors contan canzuns da cumponists ed arranschaders contemporans, en romontsch, franzos, talian, svedes. Il bloc final senumna «giavischs/futur». Cun quel envida il chor viril da sededicar al futur. Surpresas vegnan buc a muncar. Il niev ed il futur san purtar talas – bunas ni dameins bunas. Igl auditori dil concert a Laax vegn ad esser empau distratgs en quei bloc – sco quei ch'igl ei ella veta. Ins sa gie buca tgei che vegn.

Il concert communabel da Chor viril Laax e Chor mischedau Laax ha liug sonda, ils 6-5-2017 allas 20.00 e dumengia, ils 7-5-2017 allas 17.00, mintgamai ella halla da gimnastica dalla scola Grava. Suenter concert uustria e star da cumpignia.